

Bahá'u'lláh

Sas Paraulas Cuadas

Traduiiu e pubbricau grazias a sa cuntzessione de
Casa Editrice Bahá'í srl Roma

Titulu orizinale: Le Parole Celate

© Copyright 2005 Fereidun Mazlum
mazlum19@yahoo.it

Traduiiu dae s'italianu in limba sarda de mesania
dae Baldo Frau e Ottavio Campus

PRESENTADA

Sas "Paraulas Cuadas" suntis istadas riveladas in arabu, chi est sa limba de s'elocuentzia, e in persianu, chi est sa limba de sa craresa; cun custas paraulas Bahá'u'lláh cheret manifestare, cun cossizos e dedutziones, s'aparizione de su Messia nou.

In s'Epistula sua, mandada a su re de Persia, Bahá'u'lláh narada ca unas cantas invocatziones suntis indiritzadas "ai cuddos chi parent nodios po sa sapientzia e sa bontade, ma in realidade suntis iscraos de sas passionnes e de sa lussuria".

Sas "Paraulas Cuadas" suntis istadas riveladas dae Bahá'u'lláh in Bagdad, in s'annu 1274 de s'Egira (chi corrispondet a su 1857), e custu, prima chi Issu essere fatu sa deccraratzione de Ridvan, in sa cale a'fatu a ischire a sos dissipulos Suos e a totu su mundu ca issu fuidi su Messia nou annuntziau dae totus sos profetas de su tempus passau.

Bahá'u'lláh andaida fatuvatu a ispassizare in sos oros de su frumene Tigri e, cando arreuiada a domo Sua, zughiada sa cara chi ddi lughada de s'allerggia, assoras si poniada a iscriere custas zemas de poesia chi suntis istapias e suntis ancora un azudu e unu cunfortu po medissimos coros addoloraos.

Po medas annos, de custos iscritos, si nd'agataina pagas copias, iscritas a manu, e issas depian'essere cuadas cun cuidau ca sinono podiant essere iscobertas dae sos inimigos Suos.

"Su sinnificu de custu potente e dinamicu fermentu ispirituale chi Bahá'u'lláh a'fatu a ischire in sa vida de su mundu po orientare sas mentes de sos omines, amezorare sas animas e sa cunduta issoro, ad a poder esser cumprendiu dae su chi lezede, cando Issu descriede su caratile de sas Paraulas Cuadas in d'una pitica presentada chi issu faede a su comintzu de sa prima pazina de custu iscritu".

Roma, 1949

BAHÁ'U'LLÁH

SAS PARAULAS CUADAS

PRIMA PARTE
(dae s'arabu)

ISSU EST SA GRORIA DE SAS GRORIAS !

Custu est cuddu chi est calau dae su rennu de sa Groria, esprimiu dae sa limba de sa fortza e de su podere e fatu a connoscher a sos Profetas de s'antighidade. Nois nd'amus leau s'intima essentzia e dd'amus froria cun su estimentu de sa brevidade, comente prenda de favore po sos omnes zustos, demaneraghì issos potzan'abbarrare fideles a su Patu de Deus, poninde in mente in sa vida, a sa cunsinna Sua e oteninde sa zema de sa virtude divina in su rennu de s'ispiritu.

O FIZU DE S'ISPIRITU!

Su cossizu Meu primu est custu: Crica de tenner sempere su coro puru, zentile e radiosu, demodughì sa tua potzad'essere una soberania antiga, imperidura e sempiterna. 1

O FIZU DE S'ISPIRITU!

De totu sas cosas, sa prus cara po Me, est sa Zustitzia: si Mi cheres aberu non ti che allontanes de issa, demaneraghì Zeo

potza tenner fide in te. Cun s'azudu su, tue as'a seberare cun sos ogos tuos e non cun sos ogos anzenos, as'a imparare dae te etotu e non dae su ighinu tu. Supesa custu in su coro tu comente deped'essere. A narrer sa beridade, sa Zustitzia est su donu Meu po te ed est su sinnu de s'amore chi tenzo po te. Tenidda sempere presente, sa Zustitzia. 2

O FIZU DE S'OMINE!

Apo connotu s'amore Meu po te, cuau in s'essere Meu imemorabbile e in s'eternidade antiga de s'essentzia Mia; e po cussu t'apo fatu e apo marcau aintro de te sa figura Mia e t'apo isvelau sa bellesa Mia. 3

O FIZU DE S'OMINE!

Apo disizau de ti faere e t'apo fatu. Duncas amaMi, demodughì leo potza narrer su numene tu e prener s'anima tua cun s'ispiritu de sa vida. 4

O FIZU DE S'ESSERE!

AmaMi, demodughì Zeo ti ame. Si tue non Mi amas, s'amore Meu non t'ada a

sighire mai. Custu depes ischire, ca ses
su serbidore Meu. 5

O FIZU DE S'ESSERE!

Su Paradisu tu est s'amore Meu; sa omo
tua in su chelu est s'unione cun Megus.
Intraddoe, non timas. Custas cosas sun'-
destinadas a tie in su rennu Nostru de su
chelu e in sa soberania Nostra chi est in
sos artos Chelos. 6

O FIZU DE S'OMINE!

Si Mi amas allontanadi dae atie etotu, si
cricas de M'agradessere, non cundeseres
su piaghere tu, demodughì tue potzas mor-
rer'in Me e Zeo biver'po sempere in te. 7

O FIZU DE S'ISPIRITU!

Tue no as'a tenner'mai paghe si no
arrennuntzias a tie etotu e no abbaidas
cara a Mimi; ca tue ti depes goriare de su
numene Meu e non de su numene tu, ca
tue depes tenner'fide in Me e non in atie
etotu, ca Ieo cherzo esser'amau a solu,
suba onnia cosa chi esistidi. 8

O FIZU DE S'ESSERE!

S'amore Meu est sa fortessa Mia, chie intrad'aintro est siguru e salvu, e chie si che illarghiada s'ada perdere e ad'a morrere. 9

O FIZU DE SA PAROLA FAEDDADA!

Tue ses sa fortessa Mia; intra e abbarra siguru. S'amore Meu est in te, cumprendid-du, poghì tue Mi potzas bivere acanta. 10

O FIZU DE S'ESSERE!

Tue ses sa lantia Mia ei sa lughe Mia est in te etotu. Lea sa lughe dae issa e non criches atera zente foras de Me, ca leo t'apo fatu irricu e t'apo amuntau de benes e de favores. 11

O FIZU DE S'ESSERE!

T'apo fatu cun sas manos de su podere e cun sos poddighes de sa fortza e Zeo Mi auguro chi potzad'abbarrare aintro de te s'essentzia de sa lughe Mia. Cuntentadi cun cussu e non criches ateras cosas, ca s'opera Mia est perfeta e s'ordine Meu est inviolabbile. Non ddu discutas ne ddu ponzas in duda. 12

O FIZU DE S'ISPIRITU!

T'apo fatu irricu, puite cheres torrare a poberu? T'apo fatu nobile puite ti cheres abbassare? Zeo t'apo iau sa vida dae s'essentzia de sa sabidoria, puite cricas sa lughe foras de Me? T'apo cumpostu cun sa terra de s'amore, puite cricas atera zente? Abbaida aintro de te etotu e as'a atzapare a Mimi, forte, potente e bastante po totu.

13

O FIZU DE S'OMINE!

Tue ses sa sienda Mia chi no ad'a tener mai fine; duncas puite times a morre-re? Tue ses sa lughe Mia, ei sa lughe Mia no si c'ada a istudare mai; duncas puite times sa fine? Tue ses sa groria Mia e sa groria Mia no ad'a irmenguare mai; tue ses s'abbidu Meu e s'abbidu Meu no si c'ada a finire mai. Abbarra duncas in s'amore tu po Me, poghì tue Mi potzas agatare in su rennu de sa groria.

14

O FIZU DE SA PAROLA FAEDDADA!

Furria sa cara cara a Mimi e arrennuntzia a totu foras che a Mimi, ca sa sobera-

nia Mia dura'po sempere ei su dominiu
Meu non fini' mai. Si cricas atera zente
foras de Me, mancarì abbarres forrogan-
de po s'eternidade s'universu intreu, su
cricare tu non ad'a serbire a nudda. 15

O FIZU DE SA LUGHE!

Irmentigadi de totu ma non de Me e
acumpanzadi cun s'ispiritu Meu. Custu chi
t'apo nau est parte de s'essentzia de su
cumamentu Meu; ponidd'in mente. 16

O FIZU DE S'OMINE!

Ti depes acumentare de Me e non cri-
ches ateru azudu, poghì nemos, francu
leo, t'ada poder azuare. 17

O FIZU DE S'ISPIRITU!

Non Mi domandes su chi non disiza-
mos po te, acumentadi duncas de cussu chi
amos dispostu po su bene tu, ca de custu ti
nde as'a zuare, si ti nd'acumentas. 18

O FIZU DE SA ISIONE MERAVIZOSA!

Apo alidau aintro de te, unu sulidu de
s'ispiritu Meu, demodughì tue M'esseris

amau. Puite M'asa abandonau cricande
un ateru amore foras de Me? 19

O FIZU DE S'ISPIRITU!

Su podere Meu suba de te est mannu e
non poded'esser'irmentigau. Sa benevo-
lentzia chi tenzo po te est sentza contu e
non poded'esser cuada. S'amore Meu ad'a-
gatau allozu aintro de te e non poded'esser
cuau. Sa lughe Mia t'est semper presente e
non podede esser oscurada. 20

O FIZU DE S'OMINE!

Apo apicau sos frutos prus bellos in sa
mata de sa gloria isprendente; puite ti che
ses allontanau, acumentandedi de frutos
prus pagu bonos? Torra a su chi est men-
zus po te in s'artu de sos chelos. 21

O FIZU DE S'ISPIRITU!

T'apo fatu nobile e tue ti ses abbas-
sau. Pesadiche duncas, a s'artesa po sa
cale Ieo t'apo fatu. 22

O FIZU DE S'ESSERE SOBERANU!

Zeo t'apo ghiau cara a sas cosas eter-

nas e tue cricas cosas chi sun' destinadas a morrere. E it'est chi t'ad'fatu allontanare dae sa voluntade Nostra e t'ad'fatu sighire su disizu tu?

23

O FIZU DE S'OMINE!

Non criches de brincare sas lacanas e ista in terminos tuos e non pretendas su chi non t'ispetada. Incrubadi adenanti de sa figura de su Deus tu, sennore de sa fortza e de sa soberania.

24

O FIZU DE S'ISPIRITU!

Non ti antes cun su poberu ca leo a issu dd'acumpanzo in sa carrela sua, e a tie, bidindedi comente ses miserabbile, t'ap'a cunfundere po s'eternidade.

25

O FIZU DE S'ESSERE!

Comente ti ses potziu irmentigare de sos irballios tuos e ti ses ocupau de sos irballios anzenos? A chie fae'gasi Zeo ddu maleigo.

26

O FIZU DE S'OMINE !

No iscovies sos pecaos anzenos ca

tue puru ses unu poberu pecadore. Si tue non pones in mente ai custu cumandamentu as'a essere maladitu e Zeo nd'ap'a essere testimonzu.

27

O FIZU DE S'ISPIRITU!

Depes ischire ca chie cussizad'a sos omnes a esser zustos e però issu fae' male, no est amigu Meu, mancarì issu faedded'a numene Meu.

28

O FIZU DE S'ESSERE!

No atribbuas a atere su ghi non tias a atribbuire a tie etotu e non faeddes de su chi non faes. Custu est su cumandamentu Meu, teninde contu.

29

O FIZU DE S'OMINE !

Non neghes a su serbidore Meu su chi issu ti pedidi, ca sa cara sua est sa Mia; duncas umiliadi adenanti Meu.

30

O FIZU DE S'ESSERE!

Faidi onnia die unu esame'ne'e cussientzia innantis chi ti tzirrient a render contu de te etotu, ca sa morte arribba'

cando mancu ti dd'ispetas e assoras as'a
deper render contu de su chi as fatu. 31

O FIZU DE S'ESSERE SOBERANU!

Cun sa morte t'apo crefiu iare unu sin-
nale de allirghia. Puite ti lamentas? Apo
fatu sa lughe po chi issa esser isprendiu
suba de atie. E puite ti cuas? 32

O FIZU DE S'ISPIRITU!

Cun sas novas allirgas de sa lughe Zeo
ti saludo: abbarrande cuntentu! Zeo ti
tzirrio a sa corte de sa santidade: abbar-
raddoe, po chi tue potzas biver in paghe
po sempere. 33

O FIZU DE S'ISPIRITU!

S'ispiritu de sa santidade ti atidi sas
novas bonas de s'unione, e puite ti
lamentas? S'ispiritu de sa soberania ti
cunfirmad'in sa causa Sua; puite ti cuas?
Sa lughe de sa cara Sua ti est de ghia;
comente ti podes perdere? 34

O FIZU DE S'OMINE!

Non ti lesses dispiaghene si non po sa

lontanantzia chi tenes dae Nois. Allirgadi
solu cando torras a t'acostire a Nois. 35

O FIZU DE S'OMINE!

Allirgadi in sa cuntentesa de su coro
tu, demodughì potzas esser dinnu de
M'atopare e de ti lugher in sa bellesa Mia. 36

O FIZU DE S'OMINE!

Non t'ispozoes de su estimentu Meu
bellu e non arrennuntzies a sa parte de
sa funtana Mia meravizosa, chi est tocada
a tie, po sa timoria de abbarrare sidiu po
sempere. 37

O FIZU DE S'ESSERE!

Camina sighinde s'arrastu de sas
lezes Mias po amore Meu e, si cricas de
M'acuntentare, brivadi de su chi disizas. 38

O FIZU DE S'OMINE!

Non ti discoides de sos cumandamen-
tos Meos, si istimas sa bellesa Mia e no
irmentighes sos cussizos Meos, si cheres
chi Ieo sia cuntentu. 39

O FIZU DE S'OMINE!

Mancari tue esseres olau in sas aeras de su chelu, non tias a atzapare pausu foras chi in sa sotumissione a su cumandamentu Nostru e in s'umilidade in dienantu de Nois.

40

O FIZU DE S'OMINE!

Lauda sas arresones Mias poghì Ieo ti potza faer a cumprendere sos misterios de sa mannesa Mia e Zeo potza mandare s'isprendore Meu suba de te cun sa lughe de s'eternidade.

41

O FIZU DE S'OMINE!

Abbassadi addienanti Meu, demodughì Ieo ti potza abbisitare beninnamente. Pesa e lota po faere inchere sa causa Mia, poghì, in su mentres chi ses ancora in custa terra, potzas binchere.

42

O FIZU DE S'ESSERE!

Procrama su numene Meu in sa terra, poghì Ieo Mi potza amentare de te in sos artos chelos e gasi an'esser cumpiaghios sos ogos Meos ei sos tuos.

43

O FIZU DE SU RENUU!

Iscurta cun sas origas Mias e abbaida cun sos ogos Meos, demaneraghì, in su profundu de s'animu tu, tue potzas esser testimonzu de sa santidade Mia manna e Zeo potza esser testimonzu de cantu tue ses artziande in santidade.

44

O FIZU DE S'ESSERE!

Afronta sa morte comente unu martire, caminande in s'istrada chi t'apo inditau, cuntentu solu de mi faer piaghene e de su chi leo disponzo, demodughì tue potzas pausare cun Megus, suta su velu de sa protetzione Mia, cun s'amparu de su tabbernaculu de sa gloria.

45

O FIZU DE S'OMINE!

Supesa e pentza. E it'est menzus, segundu te, a morrere in su letu o a illurdiare su prue ne cun su sambene tu, mortu eninde cara a Mimi, e gasi esser testimonzu de su cumandamentu Meu e de sa lughe Mia in sos artos chelos? Pentzadi bene o serbidore.

46

O FIZU DE S'OMINE!

Po su numene de sa bellesa Mia! A ti tingher sos pilos cun su sambene tu po Me, in su cunsideru Meu, est cosa prus manna de sa creazione de su mundu e de sa lughe de ambos mundos. Ti prego de cunsiderare custu, o serbidore. 47

O FIZU DE S'OMINE!

Po donnia cosa ddu ad'unu sinnale. Su sinnale de s'amore est sa firmesa in su ponnere in mente a su chi ap'istabbi-liu e sa passentzia de ti sutumitere a sas provas chi leo ti presento. 48

O FIZU DE S'OMINE!

S'amante veru disiza'sa suferentzia e gasi faede su rebberde chi disiza'su perdonu ei su pecadore disiza'sa misericordia. 49

O FIZU DE S'OMINE!

Si sas cuntrariedades non t'impedini de camminare in su caminu chi t'apo amustrau, comente as'a poder sighire s'arrastu de sos chi caminana e suni cuntentos de s'agradessimentu Meu ? Si sas provas

chi leo ti presento non t'afrizini cando
bramas de M'incontrare, comente as'a
poder arribbare a sa lughe de s'amore tu
po sa bellesa Mia?

50

O FIZU DE S'OMINE!

Sas disgratzias chi ti mando suni una
providentzia; tian'a parrer fogu e vende-
ta, ma, si cunsideras bene, suni lughe e
misericordia. Zadi coidu e bae car'a
issas, demodughì tue potzas diventare
lughe eterna e ispiritu imortale. Su chi
apo nau est su cumandamentu Meu po
te, teninde contu.

51

O FIZU DE S'OMINE!

Si esseres tentu fortuna, non ti nde
allirghes meda e si sa malasorte t'essere'-
curpiu, non t'intristes meda, ca totu eni-
d'e passada.

52

O FIZU DE S'ESSERE!

Si tue esseres biviu in poberesa, non
ti lees pena meda ca, una die o s'atera,
su Deus de s'irrichesa ad'a benner'a t'ab-
bisitare. Non timas meda s'afrizimentu

ca, una die o s'atera, sa groria ad'a intrare a domo tua.

53

O FIZU DE S'ESSERE!

Si su coro tu abbaidad' ai custu dominiu eternu chi non morit mai e ai custa antiga vida sentza fine, lassa custa soberania terrena e passizera.

54

O FIZU DE S'ESSERE!

Non t'afannes po sas cosas mundanas, puite Nois cumprobamos s'oro cun su fogu e cun s'oro cumprobamos sos serbidores Nostros.

55

O FIZU DE S'OMINE!

Tue bramas s'oro e Zeo cherzo chi tue ti nd'illiberes. Tue cres chi si tenes oro ses irricu, Zeo, invetze, pentzo chi tue sias tantu prus irricu, tantu prus arrennesses a ti distacare dae s'oro. Po sa vida Mia! Custu est su chi isco leo, sa tua est un'illusione; coment'est possibile cuncordare su pentzamentu Meu cun su tu?

56

O FIZU DE S'OMINE!

Distribbui sas irrichesas Mias a sos poberos Meos, demaneraghì tue potzas leare su chi cheres dae sas riservas de isprendore eternu in su chelu e dae sos tesoros de sa gloria imperidura. Po sa vida Mia! A oferrere s'anima tua est sa cosa prus groriosa, ma tue depes biere cun sos ogos Meos. 57

O FIZU DE S'OMINE!

Su tempiu de s'essere est su rennu Meu, purificaddu dae totu sas cosas, demaneraghì leo ddue potza bivere. 58

O FIZU DE S'ESSERE!

Su coro tu est sa omo Mia; santificaddu po cando leo ddu'ap'a calare. S'ispiritu tu est su logu de sa rivelatzione Mia, mundaddu e illichididdu po sa manifestatzione Mia. 59

O FIZU DE S'OMINE!

PoniMi sa manu aintro'e sa petorra, demodughì leo Mi potza innaltzare prus in artu de te, radiosu e isprendente. 60

O FIZU DE S'OMINE!

Pigache a su chelu Meu, demodughì tue potzas provare sa doltzura de sa cumpanzia Mia e potzas bufare de bella gana, su inu Meu meravizosu, dae su calighe de sa gloria sempiterna. 61

O FIZU DE S'OMINE!

Dies medas sun'passadas e tue t'issiminzas ancora cun custos suspetos e cun bisos vanos. Po cantu tempus ancora as'a abbarrare indromigau in su letu? Ischida e pesache sa conca, ca su Sole est artu e podet esser chi ti potzad'illuminare cun sa lughe de sa bellesa. 62

O FIZU DE S'OMINE!

Sa lughe ad'isprendiu suba de te dae s'orizonte de su Monte sagrau e s'ispiritu illuminadore a'sulau in su Sinai de su coro tu. Liberadi, duncas, dae sos velos de sas vanas fantasias e intra in sa corte Mia, demodughì tue potzas esser idoneu a sa vida eterna e potzas esser dinnu de M'incontrare. T'auguro gasi, chi tue non potzas mai connoscher ne morte, ne istrachidumene, ne afannos. 63

O FIZU DE S'OMINE!

S'eternidade Mia est sa creazione Mia, e dd'apo fata po te. Fainde s'istire de su tempiu tu. S'unidade Mia est opera de sas manos Mias; dd'apo formada po te, usadda comente un estimentu, demodughì tue potzas essere, po totu s'eternidade, sa rivelazione de s'essere Meu sempiternu. 64

O FIZU DE S'OMINE!

Sa maestosidade Mia est su donu Meu po te e sa grandiosidade Mia est su pinnu de sa misericordia Mia po te. Nemos ad'a poder cumprender o narrere su chi M'addeghede. A narrer sa beridade, custas cosas Zeo dd'as apo collias in sos magasinios prus cuaos e in sas tesorerias de su cumandu Meu, comente sinnale de s'amore teneru po sos serbidores Meos e de sa misericordia po sa zente Mia. 65

O FIZOS DE SA DIVINA ESSENTZIA INVISIBILE!

Ais a esser cuntrastaos in s'amore chi tenies po Me ei sas animas an'a esser turbadas cando an'a narrer su numene Meu,

datughì sas mentes non Mi poden'cum-
prendere, nei sos coros Mi poden'allozi-
re, ca leo seo tropu mannu. 66

O FIZU DE SA BELLESA!

In su numene de s'ispiritu Meu e de sa benevolentzia Mia! In su numene de sa misericordia Mia e de sa bellesa Mia! Totu su chi t'apo rivelau, cun su limbazu de su podere e totu su chi apo iscritu po te, cun sa pinna de sa fortza, fuidi in armonia cun sas capatzidades tuas ei su cumprendoniu tu, ma no fuidi in armonia cun s'istadu Meu, ne cun sa melodia de sa oghe Mia. 67

O FIZOS DE SOS OMINES!

No ischies puite os amos fatu a totus cun su matessi pruene? Poghì nessunu de oisateros s'essered'esartau, pentzande d'esser superiore a s'ateru. Cunsiderae semper in sos coros bostros, in cale modu seis istapios formaos. Sigomente Nois os amos fatu a totus cun sa matessi sustantzia, osi tocada de esser comente un'anima sola, de camminare cun sos matessi pes, de papare cun sa matessi

uca e de bivere in sa matessi terra, dema-
neraghì si potzana manifestare sos sinna-
les de s'unidade e de s'essentzia de s'ar-
rennuntzia e totu custu, nde potzad' essi-
re de s'intimidade de s'anima, cun sas
operas bostras. Custu est su cussizu Meu
po boisateros, o moltitudine de lughe!
Iscurtae custu cussizu, demodughì pot-
zeis arregollere sos frutos de sa santidade
dae sa mata de sa groria meravizosa. 68

O FIZOS DE S'ISPIRITU!

Oisateros seis su tesoro Meu, ca leo
apo postu in boisateros sas prellas de sos
misterios Meos ei sas zemas de sa sabi-
doria Mia. Proteziedda dae sos furisteris,
chi sun'in mesu a sos serbidores Meos e
dae sos chi sun'malos, in mesu a sa
zente Mia. 69

O FIZU DE CUSSU CHI PO MESU DE S'EN- TIDADE SUA EST ABBARRAU IN SU DOMI- NIU SU ETOTU!

Depes ischire ca leo c'ap'etau a suba
tua totu sos profumos de sa santidade,
ca t'apo isvelau in su totu sa paraula Mia,

c'apo perfetzionau, po mesu de te, sa zenerosidade Mia e apo disizau po te su chi apo disizau po s'essere Meu. Cuntentadi, duncas, cando Ieo seo cuntentu e sias semper gratu a Mimi. 70

O FIZU DE S'OMINE!

Iscric tu totu su chi t'amus isvelau cun sa tinta de sa lughe, in su fozu de s'ispiritu tu. Si custu chi ti naro no est in podere tu, lea sa tinta chi ti serbidi dae s'essenzia de su coro tu. Si custu no est possibile, iscrie cun sa tinta ruia chi ateros ana perdiu in su caminu eninde car'a Mimi. Po Me custu est prus gradiu de onnia atera cosa, t'auguro chi sa lughe sua potza'durare po sempere. 71

BAHÁ'U'LLÁH

SAS PARULAS CUADAS

SEGUNDA PARTE
(dae su persianu)

IN SU NUMENE DE SU MERE
DE SU FAEDDU, SU POTENTE.

O BOISATEROS CHI IUGHIES CONCA PO
CUMPRENDERE E ORIGAS PO ISCURTARE!

Su primu apellu de s'Istimau est
custu: o Misticu Rusinnolu! Crica de bive-
re solamente in sas orrosas de s'Ispiritu.
O missu de su Salomone de s'amore!
Non criches amparu in ateru logu ma
solu in sa saba de s'Istimau. O fenitze
imortale! Crica de ti frimare solu in su
monte de sa fidelidade. Solu inie est sa
omo tua, si cun sas alas de s'anima che
pigas a su rennu de sas cosas chi non
tenent'mai fine e cricas de arribbare a su
puntu istabbiliu. 1

O FIZU DE S'ISPIRITU!

Su puzone crica'su niu su, su rusinno-
lu s'incantu de s'orrosa; sos puzones
faene gasi ma sos coros de sos omnes,
cuntentos de su pruene chi ola'su entu,
si sun perdios in logos lontanos dae su
niu eternu ei sos ogos issoro abbaidana
solu a su ludu de su discoidu e sun bri-

vos de sa grazia de sa presentzia divina. Est aberu istranu e piedosu, po una ischizoledda de abba an perdiu sos mares de s'Artissimu e suni abbarraos aillargu de s'oriente luminoso. 2

O AMIGU!

In su zardinu de su coro tu, non pran-tes atera cosa, pranta solu s'orrosa de s'amore e non ti che lesses fuire su rusinnolu de s'afetu e de su disizu. Fae tesoro de sa cumpanzia de sos bonos amigos e crica de ti ch'isergher de sos cumpanzos malos. 3

O FIZU DE SA ZUSTITZIA!

Ainue pentzas chi ande's'innamorau, si no cara a sa idda de s'amada sua? E cale bonu cricadore ad'a agatare sa paghe lontanu dae sos disizos de su coro su? Po s'amante fidele s'unione est sa vida ei sa separatzione sa morte: su petus su non tene'passientzia ei su coro su non tene'paghe. Issu tiad'a arrennuntziare a medas vidas basteschì essere'lompiu a sa omo de s'amorada sua. 4

O FIZU DE SU PRUENE!

Ti cherzo narrer sa beridade: de totu sos omnes su prus discoidau est cussu chi pelea'po nudda e crica'de s'aprofitare de su frade su. Narae frades! Sas operas e non sas paraulas depen'essere s'ornamentu ostru. 5

O FIZU DE SA TERRA!

Dpes ischire ca, si in su coro tu ddu'abbarrad'ancora s'imbidia, mancarì pagu, non as'a poder mai lomper a su dominiu Meu chi est eternu, ne as'a poder fragare sos profumos de sa santi-dade chi suni in su santu rennu Meu. 6

O FIZU DE S'AMORE!

Ddu ad'unu passu ebbia chi ti separa-dae sas artas e groriosas puntas de sa tzelestiale mata de s'amore. Fae, duncas, unu passu e cun s'ateru intra in su rennu imortale e in sa omo de s'eternidade, poisi, iscurta su chi ti est istapiu rivelau dae sa Pinna de sa gloria. 7

O FIZU DE SA GRORIA!

Cola impresse in sa carrela de sa santidade e intrache in su chelu de sa cumunione cun Megus. Pulidi su coro cun su pannu de s'ispiritu e curre car'a sa corte de s'Artissimu.

8

O UMBRA PASSIZERA!

Passache sos prus bassos istadios de sa duda e pigache a sas puntas artissimas de sa tzertesa. Aperi sos ogos de sa beridade, demodughì tue potzas abbaidare sa bellesa chena velos e narrere: Beneitu sia'Deus, su prus artu de totus sos creadores.

9

O FIZU DE SU DISIZU!

Iscurta, iscurta custu: S'ogu mortale no ad'a bier mai sa bellesa eterna ei su coro sentza vida ad'a agatare cuntentu solu in su frore sicau; ca onniunu crica'sos similes suos e tzapa'piaghene in sa cumpanzia de sos paris suos.

10

O FIZU DE SU PRUENE!

Tuponadi sos ogos po bier sa bellesa

Mia; tuponadi sas origas po iscurtare sa durche melodia de sa oghe Mia; isboida sa mente tua de totu su chi ischis, po poder aprofitare de s'issientzia Mia e abbandona sas irrichesas, po poder aprofitare de una portzione eterna de su mare de s'irrichesa Mia chi durada po sempere. Tuponadi sos ogos po non bier nudda, francu sa bellesa Mia; tuponadi sas origas po iscurtare solu sa paraula Mia, isboida sa mente tua de totu su chi ischis e lassa solu s'issientzia Mia, demaneraghì potzas biere chena velos, cun su coro puru e limpidu e cun sas origas atentas e potzas intrare in sa corte de sa santidade Mia. 11

O OMINE CHI IUGHES DUAS VISIONES!

Serra un ogu e aperi s'ateru. Serra s'ogu chi abbaidad'a su mundu e a totu su chi ddu est in su mundu e aperi s'ateru po biere sa santa bellesa de Deus. 12

O FIZOS MEOS!

Zeo timo chi una orta chi seis brivaos de sa melodia de sa columba tzelestiale, che torreis a orruer in su buiu de sa per-

ditzione assoluta e, sigomente no ais mai
abbaidau sa bellesa de s'orrosa, potzeis
torrare a esser abba e ludu. 13

O AMIGOS!

Non trascoreis sa bellesa eterna po
una bellesa chi est destinada a finire e
non bosì fideis de etare afetu ai custu
mundu mortale fatu de pruene. 14

O FIZU DE S'ISPIRITU!

Ad'a benner su tempus in su cale su
rusinnolu de sa santidade no ad'a canta-
re sos misterios intimos e oisateros ais a
esser brivaos de sa melodia tzelestiale e
de sa oghe soberana. 15

O ESSENTZIA DE SU DISCOIDU!

Limbas misticas medas agatana
espressione in d'unu limbazu ebbia e
misterios meda chi suni cuaos, suni rive-
laos in d'una melodia ebbia; epuru, pagu
bene, non ddu ad'origa ch'intendada ne
coro chi cumprendada. 16

O CUMPAZOS!

Sas zennas chi s'aperini dae s'Ispatziu sun'iscampaniadas e sa omo de s'Amadu est colorada cun su sambene de sos amantes, epuru totus, francu calincunu, abbarrana brivos de custa tzitade tzelestiale, e fina in mesu'e cussos calincunos, foras de unu piticu numeru, no s'ad'agatau nemos chi essere'zutu su coro puru e s'ispiritu santificau. 17

O ZENTE CHI BIVEDE IN SU PARADISU SOBERANU!

Procramae a totus sos fizos de sa tzerresa ca, in sos rennos de sa santidade, acanta a su paradisu tzelestiale, est cumpassiu unu zardinu nou e, totu a inghiriu, caminan sos tzitadinos de su Rennu Soberanu ei sos chi bivene in s'artissimu Paradisu. Cricae, duncas, de lomper ai cussu puntu, demodughì potzeis iscoberere, in sos froes chi ddue suni, sos misterios de s'amore e dae sos frutos eternos chi ddue suni, potzeis imparare sos segretos de sa sabidoria divina e perfeta. Sos ogos dei cussos chi arrennesse-

n'a ch'intrare e a abbarrare suni cunten-
tos e allirgos.

18

O AMIGOS MEOS!

Ais irmentigau cussu manzanu puru e
radiosu cando, in cussos logos sagraos e
beneitos, fustis radunaos in presentzia
Mia, in s'umbra de sa mata de sa vida,
prantada in su paradisu de onnia gloria?
Incantàos e reverentes, fustis
iscurtandeMi cando bosì narao custos
tres santissimos pretzetos: "O amigos! No
depies mai preferer sa volontade ostra a
sa Mia; non depies mai disizare su chi
leo no apo disizau po boisateros; non
bosì depies acostire a Mimi si non
zughies su coro prontu e non disizeis
cosas mundanas". Si oisateros santificais
sas animas bostras ais a amentare, como
etotu, cussu logu e cussu zardinu e totus
ais a cumprèdere sa beridade de cussu
chi os apo nau.

19

*In s'otava de custas santissimas rigas, in
sa quinta Lastra de su Paradisu, Issu narada:*

O BOISATEROS CHI SEIS COMENTE MORTOS IN SU CROCADORZU DE SU DISCOIDU!

Epocas meda suni passadas ei sas vidas bostras pretziosas suni acurtziande azumai a sa fine, cun totu custu, a sa corte Nostra de santidade non ddu a'lompiu mancun'alidu de puresa de parte ostra. Seis in mesu de su mare de sa miscredentzia epuru, a paraulas, narais cun sa uca ca professais s'unica vera fide de Deus. Ais istimau a chie Ieo non istimo e ais fatu amighentzia cun s'inimigu Meu. Epuru seis caminande in sa terra Mia tranquillos e cuntentos, e non cumprendies ca sa terra Mia est istraca de oisateros e onnia cosa chi ddu est contraria a sa presentzia ostra. Si ai ais apertu sos ogos ai ais cumprendiu ca fuidi istapiu menzus una vida prena de dolores chi non custa cuntentesa, e fortzis ai ais preferiu sa morte ai custa vida. 20

O FORMA DE PRUENE CHI CAMBIADA SEMPERE!

Zeo disizo d'esser sempere cun tegus, ma tue no as crefiu confidare in Me. S'ispada de sa ribellione tua c'a'segau sa

mata de s'isperantzia tua. Zeo seo sempre acanta de te, ma tue ti che istesias de Me. Zeo apo crefiu po te una groria eterna, ma tue as seberau una irgunza chena fine. Torra ai nue seo leo, finacando ses in tempus e non perdas s'occasione tua. 21

O FIZU DE SU DISIZU!

Sos dotores ei sos sabios ana peleau annos meda po arribbare a sa presentzia de su Groriosissimu e non che suni arrennessios; c'ana gastau totu sa vida cricande a Issu, epuru no ana bistu sa bellesa de sa cara Sua. Tue, chentza perun'isfortzu, ses lompiu ai nue cherias, e chentza cricare, asa otentu su chi disizaiasa. Epuru ses abbarrau imboligau in su velu de s'egoismu ei sos ogos tuos non ana bistu sa bellesa de s'Amadu ei sas manos tuas no ana tocau sa coa de s'istimentu Su. O boisateros chi iughies ogos, abbai dae e meravizaòs. 22

A CHIE BIVEDE IN SA TZITADE DE S'AMORE!

Corpos de bentu chi eniana dae su mundu mortale ana curpiu sa lughe eter-

na ei sa bellesa de su Zovanu tzelestiale est ofuscada dae su buiu de su pruene. S'imperadore de s'amore est oprimiu dae sa zente de sa tirannia ei sa columba de sa santidade sufridi presonera in sas farrancas de sos enturzos. Sos chi bivene in sa omo de sa groria ei sa zente chi bivende in su chelu si lamentada e pranghede, invetze oisateros osi pausais in su dominiu de su discoиду e osi cussiderais amigios veros. Comente est irballiau su pentzamentu de oisateros!

23

O OISATEROS CHI SEIS TONTOS MANCARI TENZEIS SU NUMENE DE SABIOS!

Ell'e puite osi mascherais de pastores, invetzes in s'intimu seis diventaos lupos abbramios contra sas arbeghes Mias? Seis comente s'isteddu chi ispuntada innantis de s'arbeschidorzu chi parede radiosu e isprendente, ma cullonada sos viazadores de sa tzitade Mia, faindeddis cambiare istrada e che ddos imbiada cara a sas carrelas de sa perditzione.

24

O BOISATEROS CHI PARIES ZUSTOS MA SEIS CURRUMPIOS IN S'INTERNUI!

Seis comente s'abba limpia ma arranchia chi parede pura e cristallina, ma cando dda prova'su divinu Provadore, non nde balede mancu un utiu. Est aberu, sos raios de su sole arribbana siada suba'e su pruene siada suba 'e s'isprigu, ma s'isprendore est diferente, comente s'isteddu est diferente de sa terra, antzis sa differentzia est chentza misura. 25

O AMIGU MEU A PARAULAS!

Cunsidera unu momentu. As mai intendiu narrer ca s'amigu e s'inimigu bivene in su matessi coro? Ogache duncas a su furisteri demodughì s'Amigu potzad' intrare ad omo Sua. 26

O FIZU DE SU PRUENE!

Totu su chi s'agatada in su chelu e in sa terra Zeo dd'apo aprontau po te, foras che su coro de s'omine, chi dd'apo fatu po ddue bivere sa bellesa Mia ei sa groria Mia; epuru, tue as zau sa omo Mia a atera zente e onnia orta chi sa manifestatzione

de sa santidade Mia a' cricau sa omo Sua dd'ada agatada ocupada dae unu furisteri, e assoras, intendinde Si ispodestada, Issa si ch'est fuia a su santuariu de s'Amadu. E mancari m'apes fatu cussu Zeo apo cuau su segretu tu e non t'apo crefiu isbregunzire. 27

O ESSENTZIA DE SU DISIZU!

Prus de una orta, a s'arbeschidorzu, dae sos artos Chelos seo andau ad omo tua e tue fuis crocau in su letu de sa mandronia e fuis pentzande a atere e no a Mimi. Lestru comente su lampu de s'Ispiritu, Mi che seo torrau a su rennu de sa gloria tzelestiale e no apo nau nudda a nemos, mancu ai cussos chi fuini cun Megus bivinde in sa santa corte Mia. 28

O FIZU DE SA ZENEROSIDADE!

T'apo fatu cumparrer dae sos desertos de su nudda, cun su ludu de su cumandu Meu e apo predispostu onni atomu chi s'agatada e s'essentzia de onnia cosa fata po s'addestramentu tu. Gasighi, prima chi tue esseres essiu dae su corpus de mama

tua, t'apo aprontau duas funtanas de late isprendente, ogos po ti mirare e coros po t'amare. T'apo nutriu cun s'amore Meu teneru, suta s'umbra de sa misericordia Mia, e t'apo guardau cun s'essentzia de sa gratzia Mia e de su favore Meu. S'iscopu Meu fuidi custu, chi tue esseres potziu lomper a su dominiu Meu eternu e potzeres esser dinnu de sos donos Meos invisibiles. Ma tue ses abbarrau insensibbile e, cando ti ses fatu mannu, non ti ses incurau de sos favores Meos e ti ses preocupau de vanas fantasias, gasighi ti ses irmentigau de totu e ti ses allontanau dae sa ienna de s'Amigu po andare a bivere in domo de s'inimigu.

29

O ISCRAU INCADENAU DE SU MUNDU!

Prus de una orta a s'arbeschidorzu, s'alidu de su teneru amore Meu po te, a'sulau suba de atie e t'ad' atzapau ormiu profundamente in su letu de sa mandronia. Assoras s'alidu, dispiaghiu po sa triste sorte tua, si ch'est torrau de nue fuidi enniu.

30

O FIZU DE SA TERRA!

Si cheres a Mimi, non criches a atere ma solu a Mimi; si cheres cuntemprare sa bellesa Mia, serra sos ogos e no abbaides a su mundu e a totu su chi ddu est; sigamente sa voluntade Mia est solu sa voluntade Mia, gasi su fogu e s'abba non pode ne bivere paris in su matessi coro. 31

O FURISTERI CHI AS' AGATAU AMPARU!

Sa lughe de su coro tu est alluta dae sa manu de su podere Meu, non che dd'istudes cun sos bentos malos de s'egoismu e da sa passione. Sa meighina po totus sos males tuos est s'amentu de Me, non ti dd'irmentighes. Fae de s'amore Meu po te su tesoro tu e teniddu caru, comente tenes cara sa vista ei sa vida. 32

O FRADE MEU!

Iscurta sas paraulas Mias ditzosas chi essini dae sa limba Mia prena de mele e dae sas lavras Mias prenas de tzucuru, catzadi su sidiu, bufande in s'irriu de sa santidade mistica. Ispaina su semene de sa sabidoria Mia divina in su terrinu lim-

piu de su coro tu; e abbaddu cun s'abba de sa tzertesa, demodughì sos frores de sa sapientzia Mia e de sa sabidoria Mia potzan ispuntare latucosos e irdes in sa tzitade sacra de su coro tu. 33

O ZENTE CHI BIVIES IN SU PARADISU MEU!

Cun manos de teneru amore apo prantau in su santu zardinu de su paradisu sa matighedda de s'amore e de s'amighentzia ostra e dd'apo abbau cun s'abba de sa grazia Mia tenera. Como chi est ennia s'ora de frutificare, cricae de protezere sa mata e no che dda lasseis consumare dae sas pampas de su disizu e de sa passione. 34

O AMIGOS MEOS!

Istudaeche sa candela de s'errore e allughie, in sos coros bostros, sa lughe eterna de sa ghia divina. Sigomente, de innoghe a pagu tempus, sos provadores de s'umanidade, in presentzia sagrada de s'Adorau, no an'a atzetare atera cosa chi non siada virtude purissima e atziones de santidade immaculada. 35

O FIZU DE SU PRUENE!

Sun zente sabia cuddos chi non faed-dana si non tenene su permissu, comente faede su copieri chi non zada sa tassa, finacando non tzapada chie si dda pedidi, e comente faede s'amante chi non mustrada s'ardore chi provada in su profundu de su coro su, finacando non ch'etada s'ogu a sa bellesa de s'amada. Ispaina, duncas, su semene de sa sabidoria e de s'issientzia in su terrenu limpiu de su coro tu e cuaddu, finacando sos froes de sa sabidoria divina, an'a ispuntare dae su coro e non dae su ludu e dae sa brutesa. 36

*In sa prima riga de sa lastra est rezi-
strau e iscritu, e est arregortu aintro de
su santuariu de su tabbarnaculu de Deus:*

O SERBIDORE MEU!

No abbandones unu rennu eternu po una cosa chi tenede fine, e non che fulies sa soberanidade tzeleste po unu disizu mundanu. Custu est su frumene de sa vida eterna chi a'bundau dae sa vena de

sa pinna de su Deus misericordiosu.
Biados cussos chi nde bufana! 37

O FIZU DE S'ISPIRITU!

Sega sa gabbia tua e, comente fae'sa fenitze de s'amore, oladiche in su firmamentu de sa santidade. Irmentigadi de te etotu e, animau dae s'ispiritu de sa misericordia, abbarra a bivere in su rennu de sa santidade tzelestiale. 38

O ZENTE DEPENDIA DE SU PRUENE!

Non ti cuntentes de su benistare de una die chi passad'impresse e non ti brives de su pausu eternu. Non cambies su zardinu de su piaghene eternu cun su pruene de unu mundu mortale. Pigache dae sa presone tua a sas groriosas pianuras artissimas e dae sa gabbia tua mortale oladiche cara a su paradisu chi est ai cudd'ala de s'Ispatziu. 39

O SERBIDORE MEU!

Libberadi dae sos ferros de custu mundu e libbera s'anima tua dae sa presone de s'egoismu. Aprofita de custa oca-

sione, ca apustis no ad'a essere prus possibile. 40

O FIZU DE SA SERBIDORA MIA!

Si tue esseres potziu ammirare sa soberania imortale, ti tias a isfortzare de lassare custu mundu provisoriu. Ma, a cuare una cosa e a t'amustrare s'atera, est unu misteriu chi nemos pode'cumprendere, si no est cussu chi iughe'su coro puru. 41

O SERBIDORE MEU!

Purifica su coro tu dae sa malinnidade, e sentza imbidia, tue che potzas intrare in sa corte divina de sa santidade. 42

O AMIGOS MEOS!

Caminae in sas carrelas de su piaghene de s'Amigu, e depies ischire, ca su piaghene Su est cando suni cuntentas sas creaturas Suas. Custu chere'narrere ca: nemos deped'intrare in sa omo de s'amigu si issu non cherede, ne nemos che depe'leare sos tesoros suos ne ponnere sa propria voluntade contra a sa sua, ne cricare in peruna manera de s'aprofitare

de issu. Cunsiderae bene custu chi os apo nau, oisateros chi cumprendies! 43

O CUMPANZU DE SU RENUU MEU!

No iscurtes ne bias male perunu, non ti degrades, non suspires ne prangas. Non netzas male, demodughì tue non potzas intendere su male chi sos ateros nan'áa tie, e no isazeres sas curpas anzenas, po faer'in modu chi sas tuas parzana prus piticas; non disizes s'avilimentu de nessunu, ca gasi non s'ad'a biere mancu su tu. Bive, duncas, sas dies de sa vida tua, ca custas dies suni curtzas comente un'allampiyada, cun sa mente imaculada, cun su coro puru, cun pentzamentos puros e cun natura santificada, demodughì tue potzas abandonar su corpus tu mortale e, libberu e cuntentu, ti potzas amparare in su misticu paradisu e biver po semper in su rennu eternu. 44

PAGUBBENE! O AMANTES DE SOS DISIZOS MUNDANOS !

Seis passaos lestros chei su lampu acant'a s'Amadu e ais zau sos coros

bostros a sas fantasias de Satana. Os imbenugais adenanti de sas boidas imazinatziones e narais ca suni beridades. Ch'etais s'ogu a un'ispina e narais ca est unu frore. No ais ogau dae sa uca ostra mancunu alidu puru, nei su entu de s'arrennuntzia a'tirau dae sos campos de sos coros bostros. Ais lassau andare, cun su entu, sos cussizos amorevoles de s'Amadu e ddos ais cantzellaos dae sa mesa de sos coros bostros: seis comente sas bestias de su sartu, zirais e bivies in sa pastura de su disizu e de sa perditione.

45

O FRADES IN SA CARRELA!

Puite ais trascurau de mentovare s'Amadu e abbarrais lontanos dae sa presentzia Sua? S'essentzia de sa bellesa est in sa omo bellissima, setzia in su rennu de sa gloria, in su mentres, oisateros os'afannais in vanas peleas. Sa santidade ogad'aromas sagraos e su entu de sa zenerosidade est tirande, epuru, oisateros nde seis brivos e seis totus in pistighinzu. Miserinos de boisateros e miserinos cuddos chi

caminana in sa matessi carrela ostra
sighinde s'arrastu de oisateros! 46

O FIZOS DE SU DISIZU!

Ispozaòs de sos pannos de sa vanagro-
ria e de sa superbia. 47

*In sa terza de sas santissimas rigas,
iscritas e rezistradas in sa Lastra de su
Rubinu dae sa pinna de s'Invisibbile, est
istapiu nau custu:*

O FRADES !

Siais tollerantes s'unu cun s'ateru e
non ponzeis istima a sas cosas de custu
mundu. Non diventeis superbos si tenies
sa gloria e non bosì brigunzeis de s'avili-
mentu. In su numene de sa bellesa Mia!
Apo fatu totu sas cosas dae su pruene e
in pruene totu ad'a torrare. 48

O FIZOS DE SU PRUENE!

Amentaesiddu a s'irricu cantu su
poberu suspirad'aintrenote, demodughì, su
de non s'incurare de sos ateros, no che ddu
leede a sa distruttione e no ddu brivede de

sa Mata de s'Irrichesa. Su iare e su essere de bonu coro suni donos chi tenzo leo; biadu cussu chi sighidi sas vertudes Mias. 49

O CUINTESSENTZIA DE SA PASSIONE!

Lassa onnia bramosia e cuntentadi, ca s'abbramiu est sempre discontentu e in privatzones, ma su chi est cuntentu est semper istimau e antau de totus. 50

O FIZU DE SA SERBIDORA MIA!

Non ti disconsole cando ses poberu e non cunfides in s'irrichesa, poite infatu de sa poberesa eni's'irrichesa e infatu de s'irrichesa eni'sa poberesa.. Epuru a esse'poberu de totu, francu de Deus, est una cosa bella; crica de ddu cumprendere, puite a sa fine Zeo t'apo a faer iricu de Deus e gasi as'a connoschere su sinnificau de su ditzu chi narada "In veridade oisateros seis sos poberos" ei sos faeddos chi narana "Deus est Cussu Chi possedi'totu" e custas paraulas an'a risprenere groriosamente, comente faede su sole a s'arbeschidorzu in s'orizonte de su coro de s'amante e an'a abbarrare frimas in su rennu de s'irrichesa. 51

O FIZOS DE SU DISCOIDU E DE SA PAS- SIONE!

Ais permitiú a s'inimigu Meu de intrare a domo Mia e c'ais catzau s'amigu Meu, c'ais asserbau in su santuariu de su coro ostru s'amore po sos ateros e non po Me. Iscurtae su chi osi nara's'Amigu e furriaos cara a su paradisu Su. Sos amigos mundanos suni sempere in crica de sa cumi-nientzia issoro e pare'chi si amene tra issos, mentres chi s'Amigu veru os ad'amau e osi ama'sempere po su chi seis. A narrere sa beridade, Issu a'sufriu males medas po bosì pode'ghiare. Po cussu cricae de Ddi tenne'fide a un Amigu gasi e currie cara a Issu. Custu est s'astru de sa paraula de beridade e de fide, appresentau in s'orizonte de sa pinna de su Sennore de onnia Numene. Allutae sas origas, demodughì potzeis intendere sa paraula de Deus chi os'azuada in su perigulu e Chi esistidi de Se Su. 52

O BOISATEROS CHI OS'ISSUPERBIES DE SAS IRRICHESAS MUNDANAS!

Depies ischire ca s'irrichesa est una

potente barriera tra su chi disiza'una cosa e sa cosa matessi, tra s'amante e s'amada. Sos irricos, francu calincunu, no an' a arribbare mai a sa corte de sa presentzia Sua, e no an'a intrare mai in sa tzitade de su cuntentu e de sa rassinnatzione. Est meritevole duncas cussa persone chi, mancarì siad'irrica, est sempre acant'a su rennu eternu e a su dominiu sentza fine. In su Numene Supremu! S'ispredore de un omine gasi irricu ad'a illuminare sos chi bivene in su chelu, comente su sole ad'a illuminare sa zente de sa terra. 53

O BOISATEROS IRRICOS DE SA TERRA!

Sos poberos chi bivene in mesu a oisateros suni sa prenda Mia; trataeddos bene e non pentzeis solu a su benistare ostru! 54

O FIZU DE SA PASSIONE!

Pulidi dae sa contaminatzione de sas irrichesas e camina in paghe perfeta cara a su rennu de sa poberesa, demodughì dae sa funtana de s'arrennuntzia tue potzas bufare su inu de sa vida imortale. 55

O FIZU MEU!

Sa cumpanzia de su malu fae' cresce re su dolore, invetzes, s'amighentzia de su zustu che catza's'orruinzu de su coro. Chie cricada sa comunione cun Deus depe'cricare sa cumpanzia de cussos chi Issu istimada; e chie chered'iscurtare sa paraula de Deus deped'iscurtare sas paraulas de cuddos chi Issu istimada. 56

O FIZU DE SU PRUENE!

Ist'atentu! Non pratighes cun su malu e non t'acumpanzes a issu, ca sa cumpanzia sua ti cambia'sa lughe radiosa de su coro in fogu infernale. 57

O FIZU DE SA SERBIDORA MIA!

Si disizas sa gratzia de s'Ispiridu Santu, acumpanzadi cun sos omnes zustos, ca issos ana bufau dae su calighe de sa vida eterna, aporriu dae sas manos de su Copieri imortale e, gasi comente fae'su veru manzanu, Issu illuminad'e arresussita'sos coros de sos mortos. 58

O INDIFERENTES!

Non creteis chi sos sekretos de sos coros siana cuaos, a su contrariu. Depies ischire cun tzertesa ca issos suni sinnaos a literas craras e suni visibbiles a su sacru Cuspetu.

59

O AMIGOS!

Bosi naro sa beridade: calesisia' cosa tenzeis cuada in su coro, po Nois est crara e manifesta comente sa lughe de Deus; ma su chi est cuau est cuau po grazia Nostra e po favore Nostru e non ca oisateros ddu meritais.

60

O FIZU DE S'OMINE!

Dae su profundu mare de sa misericordia Mia, apo lassau calare un utiu de orrosu suba sos populos de su mundu, e no ap'atzapau a nemos chi essere dispostu a acollire cust'utiu, ca onni omine s'est allontanau dae su inu tzelestiale de s'unidade e est andau cara a sa bruta feghe de s'impuridade e, cunten-tu de bufare in sa tassa mortale, a'postu abbanda su calighe de sa bellesa imortale. A'fatu male meda a fae'su chi a'fatu.

61

O FIZU DE SU PRUENE!

No che furrieis sos ogos po non biere su inu bonissimu chi possedi's'Amadu imortale e no abbaideis sa feghe sordigosa de custu mundu. Aferra, dae sas manos de su Copieri divinu, su calighe de sa vida imortale, demodughì tue potzas intrare in possessu de onnia sabidoria e potzas iscurtare sa oghe mistica chi ti mutidi dae su rennu de s'invisibbile. Tzerriae a oghe arta oisateros chi abbaidais cara a bassu. Puite ais abandonau su inu Meu santu e imortale po bufare s'abba chi non catzada sidu?

62

O POPULOS DE SU MUNDU!

Depies ischire, in beridade, ca est eninde un'incrementzia mala e ca ais a tennere una dolorosa punitzione. Non pentzeis ca sas atziones chi ais cumitiu siana istapias cuadas a Mimi. Po sa bella Mia! Onnia cosa chi oisateros faies est istapiu iscritu dae sa pinna Mia a literas mannas e craras in lastras de oro.

63

O OPRESSORES CHI BIVIES IN SA TERRA!

Catzaeche sas manos dae sa tirannia, ca leo m'apo postu in conca de non perdonare inzustizia peruna. Custu est su cuntratu chi apo decretau cun fortza, in sa lastra cuada e suzellada cun su suzellu de gloria.

64

O REBBELLES!

Su bonu coro Meu os'a'rendios atri vios ei sa tollerantzia Mia os'a'fatos discoidosos e, po cussu, ais ispronau su caddu fogosu de sa passione e dd'ais fatu currere in sas carrelas perigulosas chi andana cara a sa distrutzione. It'ais pentzau chi leo essere discoidau o essere pentzande a atera cosa?

65

O ZENTE ERRANTE!

Os apo postu sa limba po Mi mentova re, non dd'imbruteis cun s'impostura. Si sa pampa de s'egoismu osiche brusiada, amentaeoso de sas curpas de oisateros e non de cussas de sas creaturas Mias, ca onniunu de oisateros connosched' a issu etotu menzus de totu sos ateros.

66

O FIZOS DE SA FANTASIA !

Depies ischire ca, cando su sole radio-su de su manzanu ad'a intrare in s'orizonte de sa santidade eterna, sos segretos de Satana ei sas atziones fatas in su buiu de sa note an'a aparrere nuas e craras adae-nanti de sos populos de sa terra. 67

O ERBA NASCHIA DAE SU PRUENE !

E poite non t'as frobbiu sas manos brutas in pannos tuos, e puite, cun su coro contaminau dae su disizu e dae sa passione, cricas de intrare in comunione cun Megus e de penetrare in su rennu Meu sagrau? Seis allargu, allargu meda seis dae cussu chi disizais. 68

O FIZOS DE ADAMU!

Sas paraulas santas ei sas atziones puras e bellas che pigan'a su paradisu de sa gloria tzelestiale. Isfortzaeòs, demodughì sas atziones de oisateros, illimpiadas dae su pruene de s'egoismu e de s'ipocri-sia, siana bene cunsideradas in sa corte de sa gloria, ca, deinnoghe a pagu tempus, sos provadores de s'umanidade, a

sa presentzia santa de s'Adorau, no an'a atzetare atera cosa sinò virtude assoluta e atziones de puresa imaculada. Custu est s'astru de sa sabidoria e de su misteriù divinù chi ad' isprendiu in s'orizonte de sa voluntade divina. Biados cuddos chi abbaidan'a cuss'astru.

69

O FIZU DE SA MUNDANIDADE!

Pragherosu est su rennu de s'esistentzia, si tue c'arrennessis a ch'intrare, groriosu est su dominiu de s'eternidade, si tue c'arrennessis a passare ai cudd'ala dei su mundu mortale, prena de dortzura est s'estasi santa, si tue arrennesses a bufare in su mistigu calighe, aporriu dae sas manos de su Zovanu tzelestiale. Si tue arrennesses a faere custu ti tias a libberare dae sa morte e dae sa distrutzione, dae s'istrichesa e dae su pecau.

70

O AMIGOS MEOS!

Amentaeos su cuntratu chi ais fatu cun Megus, in su Monte de Paran, chi si tzapada aintro de sos dominios sagraos de

Zaman. Comente tistimonzos apo leau sas tropas chi suni in su chelu ei sos chi bivene in sa tzitade eterna, epuru, non tzap'a nemos chi sia'fidele a su cuntra-tu. Sentza duda peruna, sa superbia ei s'avolotu ana cantzellau su cuntratu dae sos coros ei como non d'abbarrada manc'arrastu. Ma, mancari ischindeddu, apo ispetau e no apo iscoviau nudda a nessunu.

71

O SERBIDORE MEU!

Tue ses comente un'ispada bene temperada, cuada in su buiu de s'istuzu su ei sa bellesa sua no dd'ada a connoscher mancu su chi dd'a'fata. Po cussu, essiche dae s'istuzu de s'egoismu e de su disizu, demodughì su valore tu potza'diventare lughente e craru a totu su mundu.

72

O AMIGU MEU!

Tue ses s'astru de sos chelos de sa santidade Mia, non permitas chi sos males de su mundu cuene s'isprendore tu. Istratzache sos velos de su discoidu, demodughì tue potzas pigare prus in artu

de sas nues e potzas frorire totu sas cosas cun su mantu de sa vida. 73

O FIZOS DE SA VANAGRORIA!

Po una soberania de pagu tempus, ais abandonau su rennu Meu eternu e osi seis ornaos cun su estire colorau de su mundu e ais fatu braga. Po sa bellesa Mia! Zeo os'ap'a arregollere a totus, suta de unu mantu de pruene e ap'a destruere totu cussos colores, francu sos de cussos chi seberana su Meu de colore, chi tiad'a essere chena perunu colore. 74

O FIZOS DE SU DISCOIDU!

No eteis istima a sa soberania mortale e non bos allirgheis. Oisateros seis comente su puzone atriviu chi cantada allirgu in suba'e sa nae, finacando sa morte no che dd'iscudede a su pruene ei sas melodias, sa forma ei sos colores iscumparini sentza lassare arrastu. Po cussu istae atentos, o iscraos de su disizu! 75

O FIZU DE SA SERBIDORA MIA!

Sa ghia est istapia sempere zada cun

sas paraulas, como est istapia iada cun atziones. Onniunu depe'mustrare atziones puras e santas, ca sas paraulas suni de totus, mentres cussas atziones apartenene solu a sos chi istimamos Nois. Isfortzaeòs, duncas, cun totu su coro e cun totu s'anima, po bosì distinguere cun sas atziones bostras. Custu est su cussizu Nostru in custa santa e lughente lastra. 76

O FIZU DE SA ZUSTITZIA!

Aintrenote, sa bellesa de s'essere mortale si est cuada in suta de su Sadratu'l-Muntahá, apustis de nd'essere calada dae sas arturas ismerardinas de sa fidelidade e a'prantu cun d'unu prantu tantu forte chi, sos chi bivene in sos chelos e in sos rennos artos ana prantu issos puru, intendinde sos lamentos Suos. Assoras dd'ana domandau: E puite custos prantos e lamentos? E Issu ad'arrespostu: Comente est istapiu istabbiliu, Zeo Mi seo frimau ispetande in su monte de sa fide, ma no ap'intendiu perunu fragu de fide dae cussos chi bivene in sa terra. Assoras m'ana tzerriau e Zeo seo torrau insegus e apo

bistu, tristu de Me, unas cantas columbas de santidade, turmentadas cun crudelidade dae sas farrancas de sos canes de sa terra. E assoras, sa Zovana de su chelu est issia impresse, bellissima e sentza velos, dae sa omo Sua mistica e a'domandau sos numenes issoro e totus an'arrespostu, ma unu no. Issa ad'insistiu e assoras a'nau sa prima litera e, sos chi bivene in sos aposentos tzelestiales si che suni essios dae sa omo de sa gloria. E cando a'nau sa segunda litera, issos che sun'orutos a terra in mesu'e su pruene dae su primu a s'urtimu. In cussu momentu s'est intendia una oghe chi essia'dae su santuariu cuau: "Finainnoghe e non prus!". In beridade, nois testimoniamos totu su chi issos ana fatu e sun' fainde.

77

O FIZU DE SA SERBIDORA MIA!

Cun sas paraulas de su Misericordiosu catzadi su sidiu, bufande in s'irriu de su misteriu divinu e abbaida in sa funtana de sa paraula divina sa lughe disvelada de s'astru de sa sabidoria. Ispaina su semene de sa sabidoria Mia divina in su

terrinu puliu de su coro e abbaddu cun
sas abbas de sa siguresa, poghì sos fro-
res de sa sabidoria e de s'issientzia cre-
scan'irdes e lieros dae sa tzitade sagrada
de su coro.

78

O FIZU DE SU DISIZU!

Po cantu tempus ancora as'a bolare in
sos rennos de su disizu? T'apo fatu sas
alas po chi tue potzas olare eretu a sos
rennos de sa mistica santidade e non
cara a sas terras de sa fantasia de s'inimi-
gu. T'apo iau finas su petene po m'allisa-
re sos pilos Meos nieddos e non po mi
che segare su tzugu.

79

O SERBIDORES MEOS!

Oisateros seis sas matas de su zardi-
nu Meu; depies atire frutos bonos e bel-
los, demaneraghì oisateros nde potzeis
gosare. E po cussu seis obbrigaos de
faere cussas artes, ca in sas artes si tza-
pa'su segretu de s'irrichesa, o zente de
bonu cumprendoniu! Ca sos resurtaos
dipendene dae sos medios e sa gratzia'e
Deus os ada a bastare po totu. Sas matas

chi non zana frutu perunu c'ana benne'-
segadas e etadas a su fogu. 80

O SERBIDORE MEU!

Sos peus sun cussos chi in sa terra
non zana frutu. Custos omnes, po narrer
sa beridade, sun cunsideraos comente
mortos, antzis po Deus, balene prus sos
mortos chi non custas animas discoida-
das chi non faene nudda. 81

O SERBIDORE MEU!

Sos menzus omnes sun cussos chi si
badanzana su ite bivere cun su tribballu
issoro e gastana su chi badanzana po su
bene issoro e de sos ateros po s'amore'e
Deus, su Mere de totus sos mundos. 82

S'isposa mistica e meravizosa fintzas ai como cuada suta sos velos de sa paraula, est istapia como, po gratzia'e Deus e de su favore Su divinu, mustrada comente sa lughe isprendente chi essidi dae sa bellesa de su Ditzosu. Seo testimonzu, o amigos meos, ca su favore est cumpretu e sa discussione finia, sa prova e s'evidentzia acraradas. Faie a biere su chi seis bonos a faere in su caminu de s'arrenuntzia. Gasi su favore divinu est istapiu cuntzediu in su totu a boisateros e a totu cussos chi sun' in chelu e in terra. Laudes a Deus, Mere de totu sos mundos!

Stampato nel mese di Luglio 2005
dalla Litotipografia Trudu e Figli snc - Cagliari
Via Logudoro, 26 - Tel. 070 663208
Via Mercalli, 39 - Tel. 070 499260

